

四庫全書

史部

欽定四庫全書

史部

古史卷
七六

詳校官編修臣溫汝适

編修臣裴謙覆勘

覆校官庶吉士臣方燁

校對官檢討臣王鍾健

謄錄貢生臣李敬敏

欽定四庫全書

古史卷六

宋 蘇轍 撰

秦本紀第六

秦之先帝顓頊之裔孫曰女脩女脩織玄鳥墮卵女脩吞之生子大業大業取少典氏之子曰女華女華生大費佐禹平水土帝錫禹玄圭禹受曰非予能成亦大費為輔帝曰咨爾費贊禹功其錫爾阜游

司馬貞曰游音旒謂阜色旌旆

之旒也

爾後嗣將大出乃妻之姚姓之玉女大費拜受佐

舜調馴鳥獸是為栢翳賜姓羸氏大費生二子一曰大廉實鳥俗氏二曰若木實費氏若木玄孫費昌去夏歸商為湯御以敗桀於鳴條子孫或在中國或在夷狄大廉玄孫曰孟戲中衍鳥身人言帝太戊聞而卜之使御吉遂以為御而妻之中衍之後世以有功故羸姓多顯遂為諸侯其玄孫曰中滴在商戎保西垂生蜚廉蜚廉生惡來惡來多力蜚廉善走父子俱以材力事紂周武王之伐紂并殺惡來是時蜚廉為紂石棺北方還無所

報死遂葬於霍太山蜚廉復有子曰季勝其後有造父
幸於周穆王封於趙城趙衰其後也惡來有子曰女防
女防生旁皐旁皐生大几大几生大駱大駱生非子以
造父之寵皆蒙趙城姓趙氏非子居犬丘好馬及畜善
養息之犬丘人言之周孝王孝王召使主馬汧渭之間
馬大蕃息欲以為大駱適嗣申侯之女為大駱妻生子
成申侯言於孝王曰昔我先酈山之女為戎胥軒妻生
子中湑以親故歸周保西垂西垂以其故和睦今我復

予大駱妻生適子成申駱重婚西戎皆服所以為王王其圖之孝王曰昔栢翳為舜主畜畜多息故有土賜姓嬴今其後世亦為朕息馬朕其分土為附庸邑之秦使復續嬴氏祀號曰秦嬴亦不廢申女之子為駱適者以和西戎秦嬴生秦侯秦侯立十年卒子公伯立公伯三年卒子秦仲立秦仲三年周厲王無道諸侯多叛之西戎為亂滅犬丘大駱之族秦仲好賢賢者歸之始有車馬侍御禮樂之好秦人所為賦車鄰也周宣王即位以

秦仲為大夫誅西戎秦仲立二十三年為西戎所殺有
子五人長曰莊公宣王乃召莊公昆弟與兵七千人使
伐西戎破之立以為秦仲後并與其先大駱地犬丘為
西垂大夫莊公居犬邱生三子長曰世父世父曰戎殺
我大父我非殺戎王則不敢入邑遂將擊戎讓其弟為
太子是為襄公莊公立四十四年卒子襄公立襄公元
年以女弟繆嬴為豐王妻二年戎圍世父犬丘虜之歲
餘復歸世父七年周幽王以褒姒故廢太子宜臼而立

伯服數欺諸侯諸侯叛之西戎大戎與申侯攻幽王殺之驪山下襄公將兵救周戰甚力有功周以戎難故東徙雒邑襄公以兵送周平王平王封襄公為諸侯賜之岐以西之地襄公於是始國乃用騶駒黃牛羝羊各一祠白帝西時十二年伐戎至岐卒子文公立文公元年居西垂官三年以兵七百人東獵四年至汧渭之會曰昔周邑我先秦嬴於此後卒獲為諸侯乃卜居之吉即營邑之十年文公夢黃虵自天下屬地其口止於廊衍

以問史敦敦曰此上帝之徵君其祠之遂作廊時用三牲祭白帝十三年初有史以紀事民多化者十六年伐戎戎敗走遂收周餘民有之地至岐岐以東獻之周十九年得陳寶二十年初設三族之刑二十七年伐南山大梓豐大特四十八年太子卒賜謚諡公以其子為太子五十年文公卒葬西山諡公子立是為寧公寧公二年徙居平陽遣兵伐蕩社三年與亳戰亳王奔戎遂滅蕩社八年侵芮芮敗我芮伯先出在魏遂與周師圍魏

執芮伯萬以歸將納之十二年伐蕩氏取之寧公生十年立立十二年卒葬西山生子三人魯姬生太子武公及德公庶子出子寧公卒大庶長弗忌威壘三父廢太子而立出子出子生五歲矣二年納芮伯萬於芮六年三父等殺出子而立故太子武公元年伐彭戲氏至華山下居平陽封宮三年討出子之亂誅三父等夷三族十年伐邾冀戎初縣之十一年初縣社鄭滅小虢十九年齊桓公始伯二十年武公卒葬雍平陽初以人

從死死者六十六人有一子曰白不立封之平陽立弟
德公德公元年初居雍城大鄭宮以三百牢祠廊時卜
居雍後子孫飲馬於河梁伯芮伯來朝二年初伏磔狗
邑四門以禦蠱德公生三十三歲而立二年卒生子三
人長子宣公中子成公少子穆公宣公立四年作密時
祭青帝與晉戰河陽勝之十二年宣公卒子九人莫立
立其弟成公成公元年梁伯芮伯來朝成公立四年卒
子七人莫立立其弟穆公穆公任好元年自將伐茅津

勝之四年取於晉晉獻公之女而太子申生之姊也五年晉獻公滅虞執虞公與其大夫百里奚以媵穆姬百里奚亡秦走宛楚鄙人執之穆公聞其賢欲重贖之恐楚人不予乃以五羖羊皮贖之百里奚已七十餘矣穆公釋其囚與語國事謝曰亡國之臣何足以言政穆公曰虞君不用子故亡非子罪也固問語三日穆公大說授之國政號曰五羖大夫百里奚讓曰臣不及臣友蹇叔蹇叔賢而世莫知臣嘗游困於齊乞食餽人蹇叔收

臣臣因欲事齊君無知蹇叔止臣臣得脫齊難遂之周王子頽好牛臣以養牛干之頽欲用臣蹇叔止臣臣復去得不誅臣事虞君蹇叔亦止臣臣知虞君不用臣而私利祿爵且留再用其言得脫一不用及虞君難以是知其賢於是穆公使人厚幣迎蹇叔以為上大夫晉獻公既殺太子申生六年晉公子重耳奔狄夷吾奔梁梁近秦欲因穆姬以求入九年晉獻公卒驪姬子奚齊為後晉大夫里克殺之荀息立卓子克又殺之夷吾重賂

秦以求入穆公許之以兵會齊師納夷吾於晉十年晉侯殺里克背內外之賂使丕鄭來聘且謝緩賂丕鄭里克之黨也言於穆公曰呂甥卻稱冀芮實為不從若重問以召之臣出晉君君納重耳蔑不濟矣穆公使泠至報問且召三子冀芮疑之遂殺丕鄭鄭子豹奔秦謂穆公曰晉侯背大主而忌小怨民弗與也伐之必出穆公曰失衆安能殺違罪誰能出君不許十三年晉饑乞糴於秦穆公問於公孫枝枝曰重施而報君將何求重施

而不報其民必攜攜而討焉無衆必敗問於百里奚百里奚曰天災流行國家代有救災卹鄰道也行道有福丕豹請伐之穆公曰其君是惡其民何罪乃輸粟於晉自雍及絳謂之汎舟之役十四年秦饑乞糴於晉晉人弗予十五年伐晉戰於韓原晉戎馬還寧而止穆公從之晉韓簡輅穆公將止之晉大夫慶鄭屢諫晉侯晉侯不聽慶鄭怒乃以救晉侯誤韓簡遂失穆公秦反獲晉侯以歸初穆公亡善馬岐下野人得而食之者三百人

吏將法之公曰豈以畜產害人乎飲之酒而赦之及戰三百人者皆從以死救公故克穆姬聞晉侯將至以太子瑩引與女簡璧登臺而履薪使以免服衰絰逆且告曰若晉君朝以入則婢子夕以死夕以入則朝以死穆公與大夫謀舍諸靈臺晉呂甥來盟改館晉侯饋之七牢十一月歸晉侯而征河東十七年晉太子圉來質歸河東而以女妻之梁伯好土功旣城而弗處命曰新里秦人取之梁人相驚曰秦將襲我乃溝公宮民懼而潰

秦遂取梁二十二年晉太子圉亡歸二十三年晉惠公卒太子圉立晉公子重耳自楚入秦穆公納女五人圉之妻與焉二十四年以兵納重耳於晉晉師軍於廬柳穆公使公子絳諭之乃退重耳入於晉殺子圉於高粱秋周襄王弟帶以狄伐王王出居鄭二十五年王使來告難穆公以兵助晉文公入襄王殺王弟帶二十八年使小子憖以兵從晉文公敗楚於城濮三十年秦晉圍鄭鄭使燭之武言於穆公曰君何用亡鄭以陪鄰鄭之

厚君之薄也穆公說與鄭人盟使杞子逢孫楊孫戍鄭而歸晉師亦歸三十二年晉文公卒杞子自鄭來告曰鄭人使我掌其北門潛師而來鄭可得也穆公訪諸蹇叔蹇叔曰勞師以襲遠非所聞也師知所為鄭必知之公辭焉召孟明西乞白乙使出師蹇叔哭之曰孟子吾見師之出不見其入也公曰爾何知爾墓之木拱矣蹇叔之子與師哭而送之曰晉人禦師必於殽必死是間吾收爾骨焉秦師過周北門左右免胄而下超乘者三

百乘王孫滿觀之曰秦師輕而無禮必敗及滑鄭商人
弦高以乘韋先牛十二以君命犒師且使遽告於鄭鄭
人使皇武子辭焉孟明曰鄭有備矣滅滑而還滑晉之
邊邑也晉先軫言於襄公發兵及姜戎敗秦師於殽獲
其三帥文嬴請於晉侯而歸之穆公素服郊次鄉師而
哭曰孤違蹇叔以辱二三子孤之罪也乃作秦誓曰番
番良士旅力既愆我尚有之仡仡勇夫射御不違我尚
不欲惟截截善諛言俾君子易詞我皇多有之昧昧我

思之蓋悔不用蹇叔也於是復任孟明以政三十五年
孟明復伐晉敗於彭衙歸而穆公用之不替孟明增修
國政重施於民晉趙衰言於諸大夫曰秦師又至必將
辟之懼而增德不可當也戎使由余於秦由余晉人亡
入戎聞穆公賢故來觀之穆公示以宮室積聚由余曰
使鬼為之則勞神矣使人為之亦苦民矣穆公怪之問
曰中國以詩書禮樂法度為政然尚時亂今戎夷無此
何以為治由余笑曰此乃中國所以亂也自上古皇帝作

為禮樂法度身以先之僅乃小治及其後世阻法度之威以督責於下下罷極則以仁義怨望於上上下下交爭至於篡弑滅宗皆以此類也夫戎狄不然上含淳德以遇其下下懷忠信以事其上一國之政猶一身之治此真聖人之治也穆公退而問內史廖曰鄰國有聖人敵國之憂也今由余賢寡人患之廖曰戎君處辟匿未聞中國之聲也君試遺女樂以奪其志留由余莫遣以失其期戎君怪之必疑君臣有間乃可虜也穆公曰善因

與由余曲席而坐傳噐而食問其地形兵勢盡察且令
廖以女樂二八遺戎君戎君受而說之於是秦乃歸由
余由余數諫不聽穆公因使人間要之由余遂去降秦
穆公以客禮禮之問伐戎之形三十六年穆公復伐晉
濟河焚舟取王官及郊晉人不出遂自茅津濟封殽尸
而還三十七年穆公以由余計伐戎益國十二開地千
里遂伯西戎是歲楚穆王滅江穆公為之降服出次不
舉過數大夫諫公曰同盟滅雖不能救敢不矜乎吾自

懼也三十九年穆公卒葬雍從死者百七十七人子車氏之三子奄息仲行鍼虎皆在秦之良也秦人哀之為賦黃鳥之詩穆公子四十人太子瑩代立是為康公晉襄公之弟雍在秦襄公卒太子少趙盾使先蔑士會逆雍於秦將立之康公元年以兵送雍至令狐趙盾畏逼更立太子而背秦反擊秦師秦師敗先蔑士會來奔二年伐晉取武城四年晉伐我取少梁我伐晉取北徵六年使西乞術聘魯始通東諸侯冬伐晉取羈馬晉趙盾

帥師從我於河曲其將史駢曰秦不能久請深壘固軍以待之從之秦人欲戰問於士會士會知駢之謀曰趙有側室曰穿好勇而狂若以輕者肆焉其可秦軍掩晉上軍穿果追之趙盾不得已乃皆出戰交綏秦師夜遁史駢請追之穿又不可乃止晉人患我之用士會也七年使魏壽餘偽叛以誘士會康公為之出兵秦兵在河西魏人在河東使士會與魏人言魏人得士會譟而歸康公立十二年卒子共公稻立元年晉人將求成使趙

穿侵崇曰秦急崇必救之可以求成秦不許二年伐晉
圍焦四年共公卒子桓公立四年晉人白狄伐我二十
三年與白狄伐晉二十五年秦晉為成會於令狐晉厲
公先至桓公不肯涉河使史黶盟晉侯於河東晉使卻
欒盟桓公于河西歸而背之召狄與楚欲道以伐晉二
十七年晉侯以諸侯之師伐我我師敗績晉師濟涇至
侯麗而還二十八年桓公卒子景公立景公五年晉悼
公立晉復伯十三年景公使士稚乞師於楚將以伐晉

楚令尹子囊畏晉不敢楚共王強為我出師秦師侵晉
晉饑不能報十五年晉悼公伐鄭楚子囊乞師以救鄭
鄭畏晉卒從晉盟秦庶長鮑庶長武伐晉敗晉師於櫟
十六年庶長無地會楚子囊伐宋秦嬴歸於楚十八年
晉荀偃及諸侯之大夫伐我濟涇至於櫟林荀偃欲戰
其將欒黶不順以下軍先歸晉師遂歸黶之弟鍼與士
鞅馳秦師死之黶怒欲殺鞅鞅來奔二十八年秦晉為
成使伯車如晉涖盟晉使韓起來盟三十年公弟鍼如

晉修成以兵會楚侵吳及鄭鍼有寵於桓公有車千乘
三十六年鍼懼選出奔晉景公立四十年卒子哀公立
鍼歸自晉十四年楚平王為太子建取於秦至國費無
極勸王取之使令尹子瑕來拜夫人三十年吳王闔閭
伐楚入郢楚昭王亡奔隨其大夫申包胥來告急立於
庭下而哭七日不絕聲勺飲不入口哀公哀之使子蒲
子虎帥車五百乘以救楚大敗吳師吳師歸楚昭王復
入郢哀公立三十六年卒太子蚤死謚為夷公立其子

是為惠公惠公立十年卒子悼公立十四年卒子厲共

公立厲共公二年蜀人來賂十六年塹河旁

一作阿旁

以兵

二萬伐大荔取其王城二十一年初縣潁陽晉取武城

二十四年晉亂殺知伯分其地與韓魏趙二十五年智

開與邑人來奔三十三年伐義渠虜其王厲共公立三

十四年卒子躁公立二年南鄭反十三年義渠伐我至

渭南十四年躁公卒立其弟懷公懷公四年庶長毚與

大臣圍懷公懷公自殺懷公太子曰昭子蚤死大臣立

昭子之子是為靈公靈公四年晉城少梁秦擊之十年
城藉姑靈公卒子獻公不得立立靈公季父悼子是為
簡公簡公昭子之弟而懷公子也簡公六年令吏初帶
劔塹洛城重泉十五年卒子惠公立惠公十一年子出
子生十三年代蜀取南鄭惠公卒出子立出子二年庶
長改迎靈公之子獻公于河西而立之殺出子及其母
沉之淵秦自懷公以來數易君君臣乖亂晉奪秦河西
地獻公元年止從死二年城櫟陽四年正月庚寅子孝

公生十六年桃冬花十八年雨金櫟陽二十一年與晉
戰於石門斬首六萬天子賀以黼黻二十三年與魏晉
戰少梁虜其將公孫痤二十四年獻公卒孝公立生二
十一年矣是時河山以東強國六與齊威楚宣魏惠燕
悼韓哀趙成侯並淮泗之間小國十餘楚魏與齊接界
魏築長城自鄭濱洛以北有上郡楚自漢中南有巴黔
中周室微諸侯力爭相併秦辟在雍州不與中國諸侯
會盟夷翟遇之孝公於是布惠振孤寡招戰士明功賞

元年下令國中曰昔我穆公自岐雍之間修德行武東平晉亂以河為界西伯戎翟廣地千里天子致伯諸侯畢賀為後世開業甚美會往者厲蹠簡公出子之不寧國家內亂未遑外事三晉攻奪我先君河西地諸侯卑秦醜莫大焉獻公即位鎮撫邊境徙治櫟陽且欲東伐復穆公之故地脩穆公之政令寡人思念先君之意常痛於心賓客羣臣有能出奇計強秦者吾且尊官與之分土於是出兵東圍陝城西斬戎獮王衛鞅聞是令下

西入秦因景監見二年天子致胙三年衛鞅說孝公變法脩刑內務耕稼外勵戰死之賞罰孝公善之甘龍杜摯等相與爭之卒用鞅法百姓苦之居三年百姓便之乃拜鞅為左庶長七年與魏惠王會社平八年與魏戰元里有功十年衛鞅為太良造將兵圍魏安邑十二年作為咸陽築冀闕徙都之并諸小鄉聚集為大縣縣一令凡四十一縣為田開阡陌東地度洛十四年初為賦十九年天子致伯二十年諸侯畢賀使公子少官帥師

會諸侯逢澤朝天子二十二年衛鞅擊魏虜魏公子卬

封鞅為列侯號商君二十四年與晉戰岸門

史記本紀作鴈門年

表作岸門秦與韓魏戰非鴈門也

虜其將魏錯孝公卒子惠文君立誅

衛鞅鞅之初為秦施法法不行太子犯禁鞅曰法之不

行自於貴戚君必欲行法先於太子太子不可黥黥其

師傅於是法大用秦人治及孝公卒太子立宗室多怨

鞅鞅亡因以為反卒車裂以徇元年楚韓趙蜀人來朝

二年天子賀三年王冠四年天子致文武胙齊魏為王

蘇秦自燕入趙說諸侯約從以拒秦五年以陰晉人公

孫行為大良造東說齊魏與共攻趙以敗從約史記秦本紀及

六國世家皆不言蘇秦約從事秦本紀止言犀首為大良造趙世家止言決河水灌齊魏然皆不言其故今採

蘇秦傳載之秦趙事中以六年魏納陰晉陰晉更名寧為此大事不可不錄也

秦七年公子卬與魏戰虜其將龍賈斬首八萬八年魏

納河西地九年渡河取汾陰皮氏與魏王會應圉焦降

之楚魏戰於陘山魏許秦以上洛以絕秦於楚魏敗楚

於南陽秦責賂於魏魏不與管淺謂秦王曰何不謂楚

王曰魏許寡人以地今戰勝而背之王何不與寡人魏
畏秦楚之合必與秦地矣是魏勝楚而亡地於秦也是
王以魏地德寡人也魏若不出地則王攻其南寡人絕
其西魏必危秦王曰善以是告楚楚王揚言與秦遇十
年魏納上郡十五縣張儀相秦十一年縣義渠歸魏焦
曲沃義渠君為臣更名少梁曰夏陽十二年初臘十三
年韓君為王使張儀伐取陝出其人與魏十四年君始
稱王更為元年二年張儀與齊楚大臣會齧桑三年韓

魏太子來朝張儀相魏五年王游至北河七年樂池相
秦韓魏趙燕齊楚帥匈奴共攻秦秦使庶長疾與戰脩
魚虜其將申差敗趙公子渴韓太子奐斬首八萬二千
八年張儀復相秦九年司馬錯伐蜀滅之伐取趙中都
西陽十年韓太子蒼來質伐取韓石章伐敗趙將泥伐
取義渠二十五城十一年樗里疾攻魏焦降之敗韓岸
門斬首萬走其將犀首公子通封於蜀陳莊為蜀相
陳莊
相蜀據張儀傳
及華陽國志云
十二年王與梁王會臨晉庶長疾攻趙

虜趙將莊張儀相楚十三年庶長章擊楚於丹陽虜其
將屈匄斬首八萬又攻楚漢中取六百里置漢中郡楚
圍雍氏秦使庶長疾助韓攻楚到滿助魏攻燕十四年

伐楚取趙陵丹犁蜀相莊殺蜀侯來降

所殺必公子通也案後蜀侯名

煇知通已死

惠王卒子武王立韓魏齊楚趙皆賓從武王元

年與魏哀王會臨晉誅蜀相莊張儀魏章皆東出之魏
伐義渠丹犁二年初置丞相樗里疾甘茂為左右丞相
張儀死於魏三年與韓襄王會臨晉外南公揭卒樗里

疾相韓武王謂甘茂曰寡人欲容車通三川窺周室死
不恨矣茂於是請攻宜陽秋使甘茂庶長封伐宜陽四
年拔宜陽斬首六萬涉河城武遂魏太子來朝武王有
力好戲力士任鄙烏獲孟說皆至大官王與孟說舉鼎
絕膺八月武王卒族孟說武王取魏女為后無子立異
母弟稷是為昭襄王

昭襄王名見趙世家

昭襄母楚人姓芊氏號

宣太后武王之卒也昭襄王為質於燕燕人送歸得立

昭襄王元年嚴君疾為相甘茂出之魏二年彗星見庶

長壯與大臣諸公子為逆皆誅死惠文后亦不得其死

案穰侯傳武王母號惠文后先武王死然則惠文后昭王之嫡母也秦倍猛暴雖殺嫡母亦不足怪然與穰侯

異傳出悼武王后歸之於魏三年王冠與楚王會黃棘與

楚上庸四年取蒲坂慧星見五年魏王來朝應亭復與

魏蒲坂六年蜀侯煇反

史記不記煇之封蜀披華陽國志煇為蜀侯祭而歸胙后母疾

之加毒以進王怒誅之蓋非反也未知孰信

司馬錯定蜀庶長奐伐楚斬首

二萬涇陽君質於齊日食晝晦七年拔新城擣里疾卒

八年使將軍芊戎攻楚取新市楚懷王來朝因留之九

年齊孟嘗君薛文來相秦與攻楚取八城殺其將景快
十年楚懷王亡走趙趙不受復入秦薛文免樓緩為丞
相十一年齊韓魏共攻秦軍於函谷求出楚懷王秦王
謂樓緩曰三國之兵深矣寡人欲割河東而講對曰割
河東大費也免於國患大利也此父兄之任也王何不
召公子池而問焉王召公子池而問之對曰講亦悔不
講亦悔王曰何也對曰王割河東而講三國雖王必曰
惜矣三國且去吾特以三城從之此講之悔也王不講

三國入函谷咸陽必危王又曰惜矣吾愛三城而不講
此又不講之悔也王曰鈞吾悔也寧亡三城而悔無危
咸陽而悔也寡人決講矣卒使公子池與魏封陵與韓

武遂以和

史記於此言齊韓魏趙宋中山共攻秦至塩氏而還秦與韓魏河北及封陵以和是年魏

哀王二十三年韓襄王十六年齊湣王二十八年也案
孟嘗君傳湣王二十五年孟嘗君相秦是年秦留楚懷
王明年孟嘗君得脫歸相齊而怨秦約韓魏共攻秦求
出楚懷王湣王二十八年三國攻秦至函谷求出懷王
而不得而史記於此言攻秦者六國又於齊韓魏世家
年表魏哀王二十一年韓襄王十四年齊湣王二十六
年皆言三國攻秦是時孟嘗君初自秦逃歸則未有糾
合三國同起兵者而韓襄王二十六年年表復言與魏齊

擊秦秦與我武遂以和三平之間三國不應再擊秦且
戰國策亦止言三國今以秦本紀之年及孟嘗君傳事
為定并改定
三國世家 慧星見楚懷王死於秦歸葬十二年樓緩

免魏冉為相予楚粟五萬石十三年向壽伐韓取武始
左更白起攻新城五大夫禮亡奔魏任鄙為漢中守十
四年白起攻韓魏於伊闕斬首二十四萬虜公孫喜拔
五城十五年大良造白起攻魏取垣復予之攻楚取宛
十六年左更錯取軹及鄧魏冉免相封公子市宛公子
惲鄧魏冉陶為諸侯十七年東周君來朝以垣易蒲坂

皮氏王之宜陽十八年錯攻垣河雍決橋取之十九年
王為西帝齊為東帝已復去之呂禮來自歸齊滅宋任
鄒卒王之漢中又之上郡北河二十一年錯攻魏河內
魏獻安邑秦出其人募徙河東賜爵赦罪人遷之涇陽
君封宛二十二年蒙武伐齊取河東為九縣與楚王會
宛與趙王會中陽二十三年尉斯離與三晉燕伐齊破
之濟西齊湣王走莒王與魏王會宜陽與韓王會新城
二十四年與楚王會鄢又會穰秦取魏安城至大梁燕

趙救之秦兵去二十五年拔趙二城與韓王會新城與魏王會新明邑二十六年穰侯冉復相二十七年錯攻楚赦罪人遷之南陽白起攻趙取代光狼城又使司馬錯發隴西因蜀攻楚黔中拔之二十八年白起攻楚取鄢鄧赦罪人遷之二十九年白起攻楚取郢為南郡楚王走周王來王與楚王會襄陵白起為武安君三十年蜀守若伐取巫郡及江南為黔中郡三十一年白起伐魏取兩城楚人反我江南三十二年相穰侯攻魏至大

梁破暴鳶斬首四萬鳶走魏入三縣請和三十三年客
卿胡傷攻魏卷蔡陽長社取之三十四年白起擊芒卯
華陽破之斬首十五萬魏入南陽以和秦與魏韓上庸
地為一郡南陽免臣遷居之三十五年佐韓魏楚伐燕
初置南陽郡三十六年客卿竈攻齊取剛壽與穰侯魏
人范雎入秦上書見王言穰侯越韓魏而攻齊剛壽不
便於國王拜范雎為客卿三十八年中更胡傷攻趙閼
與不能取四十年悼太子死魏歸葬芷陽四十一年夏

攻魏取邢邱懷范睢復言於王曰太后穰侯用事高陵

君華陽君

華陽一作葉陽

涇陽君佐之自有秩以上至諸大吏

及王左右無非相國人者恐萬世後有秦國者非王之
子孫也王恐廢太后逐穰侯高陵華陽涇陽君於關外
而拜范睢為丞相封應侯四十二年安國君為太子十
月宣太后薨葬芷陽鄠山九月穰侯出之陶昭王謂左
右曰今時韓魏與始孰強對曰不如始強王曰今時如
耳魏齊與孟嘗芒卯孰賢對曰不如王曰以孟嘗芒卯

之賢率強韓魏以攻秦猶無柰寡人何也今以無能之如耳魏齊而率弱韓魏以伐秦其無柰寡人何亦明矣

左右皆曰然中旗對曰

中一作申

王之料天下過矣當晉六

卿之時知氏最強滅范中行又率韓魏之兵以圍趙襄子於晉陽決晉水以灌晉陽之城不堪者三板知伯行水魏桓子御韓康子參乘知伯曰吾始不知水之可以亡人之國也乃今知之汾水可以灌安邑絳水可以灌平陽魏桓子肘韓康子韓康子履魏桓子肘足接於車

上而知氏地分身死國亡為天下笑今秦兵雖強不能
過知氏韓魏雖弱尚賢其在晉陽之下也此方其用肘
足之時也願王之必勿易也昭王聞之而懼四十三年
白起攻韓拔九城斬首五萬四十四年攻韓南陽取之
四十五年五大夫賁攻韓取十城華陽君慄出之國未
至而死四十七年秦攻韓上黨上黨降趙趙發兵擊秦
相距秦使白起擊大破趙於長平四十餘萬盡殺之四
十八年十月韓獻垣雍秦軍分為三軍白起歸王齕將

伐趙武安皮牢拔之司馬梗北定太原盡有韓上黨正月
兵罷復守上黨十月五大夫陵攻趙邯鄲四十九年正
月益發卒佐陵陵戰不善免王齕代將十月將軍張唐
攻魏為蔡尉捐弗守還斬之五十年武安君白起得罪
為士伍遷陰密張唐攻鄭拔之十二月益發卒軍汾城
旁白起未至陰密賜死齕攻邯鄲不拔去奔汾軍二月
餘攻晉軍斬首六千晉軍走流死河二萬人汾軍從唐
拔寧新中寧新中更名安陽初作河橋五十一年將軍

卷六
摎攻韓取陽城負忝斬首四萬攻趙取二十餘縣首虜
九萬西周君背秦與諸侯約從將天下銳兵出伊闕攻
秦令秦毋得通陽城於是秦使將軍摎攻西周西周君
自歸於秦頓首受罪盡獻其邑三十六口三萬秦王受
之歸其君於周五十二年周民東亡其器九鼎入秦周
初亡五十三年天下來賓魏後至秦使摎伐魏取吳城
韓王入朝魏委國聽令五十四年王郊見上帝於雍五
十六年秋昭襄王卒子孝文王立尊唐八子為唐太后

而合其葬於先王韓王哀經入弔祠諸侯皆使其將相

來弔祠視喪事孝文王元年十月己亥即位赦罪人修

先王功臣褒厚親戚弛苑囿三日辛丑卒子莊襄王楚

立莊襄王本名異人養母華陽太后楚人也故更名楚大赦罪人修先王功臣施

德厚骨肉布惠於民東周君與諸侯謀秦使相國呂不

韋誅之盡入其國封其君陽人以奉其祭祀使蒙驩伐

韓韓獻成臯鞏秦界至大梁初置三川郡元年使蒙驩

攻趙定太原二年蒙驩攻魏高都汲拔之攻趙榆次新

城狼孟取三十七城四月日食三年王齕攻上黨初置

太原郡魏將無忌帥五國兵擊秦秦却於河外蒙驁敗

解而去五月丙午莊襄王卒

史記秦紀多以先王之末年為後王之元年今皆以

年表子政立是為秦始皇帝秦王政二十六年初并天

下為三十六郡號始皇帝立五十一年而崩子胡亥立

是為二世皇帝三年諸侯並起畔秦趙高殺二世立子

嬰子嬰立月餘諸侯誅之遂滅秦秦本嬴姓其後以國

為姓有徐氏郟氏莒氏終黎氏運奄氏菟裘氏將梁氏

黃氏江氏脩魚氏白冥氏飛廉氏秦氏然秦以造父封
趙城為趙氏

蘇子曰三代聖人以道御天下動容貌出詞氣逡巡廟
堂之上而諸侯承德四夷向風何其盛哉至其後世稍
衰桓文迭興而維持之要之以盟會齊之以征伐既已
卑矣然春秋之後吳越放恣繼之以田常三晉之亂天
下遂為戰國君臣之間非詐不言非力不用相與為盜
跖之行猶恐不勝雖桓文之事且不試矣而況於文武

成康之舊與秦起於西垂與戎翟雜居本以強兵富國
為上其先襄公最賢詩人稱之然其所以為國者亦猶
是耳詩曰蒹葭蒼蒼白露為霜所謂伊人在水一方夫
蒹葭之方盛也蒼蒼其強勁而不適於用至於白露凝
戾為霜然後堅成可施於人今夫襄公以耕戰自力而
不知以禮義終成之豈不蒼然盛哉然而君子以為未
成故其後世怛於為利而不知義至於商君厲之以法
風俗日惡鄙詐猛暴甚於六國卒以此勝天下秦之君

臣以為非是無足以服人矣當是時諸侯大者連地數千里帶甲數十萬雖使齊桓晉文假仁義挾天子以令之其勢將不能行惟得至誠之君子自修而不爭如商周之先君庶幾可以服之孟子游於齊梁以此干其君皆不能信以為詐謀奇計之所不能下長戟勁弩之所不能克區區之仁義何足以致此然魏文侯當時之弱國也君王后齊之一婦人也魏文侯行仁義禮下賢者用卜子夏田子方段干木而秦人不敢加兵君王后用

齊四十餘年事秦謹與諸侯信而齊亦未嘗受兵而況於力行仁義中心慘怛終身不懈而有不能勝者哉夫衣冠佩玉可以化強暴深居簡出可以却猛獸定心寡欲可以懷鬼神孟子曰仁不可為衆誠因秦之地用秦之民按兵自守修德以來天下彼將襁負其子而至而誰與共守惜乎其明不足以知之竭力以勝敵敵勝之後二世而亡其數有以取之矣

古史卷六

欽定四庫全書

古史卷七

宋 蘇轍 撰

秦始皇本紀第七

秦始皇帝者秦莊襄王子也莊襄王為秦質子於趙見
呂不韋姬悅而取之生始皇以昭王四十八年正月旦
生於邯鄲因名政年十三莊襄王卒政代立為秦王是
時秦地已并巴蜀漢中越宛有郢置南郡矣北收上郡
以東有河東太原上黨郡東至滎陽滅二周置三川郡

呂不韋為相封十萬戶號文信侯招致賓客游士欲以并天下李斯為舍人蒙驩王齎庶公等為將軍王年少初即位委國事大臣晉陽反元年將軍蒙驩擊定之韓遣水工鄭國來間作鄭國渠欲以弊秦不暇外事二年庶公將攻卷斬首三萬三年蒙驩攻韓收十三城王齎死十月蒙驩收魏畷有詭歲大饑四年拔畷有詭秦質子歸自趙趙太子出歸國十月庚寅蝗從東方來蔽天下疫百姓納粟千石拜爵一級五年蒙驩攻魏定酸

秦燕虛長平雍邱山陽皆拔之取二十城初置東郡冬
雷六年韓魏趙衛楚共擊秦取壽陵秦兵出五國兵罷
拔衛以益東郡其君角率其枝屬徙居野王阻其山以
保魏之河內七年彗星先出東方見北方五月見西方
蒙騫死收龍孤慶都還兵攻汲彗星復見西方十六日
夏太后卒八年王弟長安君成矯將兵擊趙反死屯留
軍吏皆斬卒死者戮其尸遷其民於臨洮河魚大上民
東就食魚嫪毐封長信侯予之山陽地令毐居之宮室

車馬衣服苑囿馳獵恣毒事無大小皆決於毒又以河西太原郡為毒國九年彗星見或竟天攻魏垣蒲陽四月王在雍已酉王冠帶劔長信侯毒作亂而覺矯王御璽及太后璽以發縣卒及衛卒官騎戎翟君公舍人欲攻斬年宮王知之令相國昌平君昌文君發卒攻毒戰咸陽斬首數百皆拜爵宦者在戰中亦拜爵一級毒等敗走即令國中有生得毒賜錢百萬殺之五十萬盡得毒等衛尉竭內史肆佐弋竭中大夫令齊等二十人皆

梟首車裂以徇滅其宗及其舍人輕者為鬼薪及奪爵
遷蜀四千餘家家房陵四月寒凍有死者楊端和攻衍
氏彗星見西方又見北方從斗以南八十日十年相國
呂不韋坐嫪毐免遷太后雍桓齮為將軍齊趙來置酒
羣臣以太后事諫王相繼死者二十七人齊人茅焦說
王曰秦方以天下為事而大王有遷母太后之名恐諸
侯聞之由此背秦王乃自迎太后於雍入咸陽復居甘
泉宮大索逐客李斯上書說乃止斯因說王請先取韓

以恐它國於是使斯下韓韓王患之與韓非謀弱秦大
梁人尉繚來說王曰以秦之強諸侯譬如郡縣之君臣
但恐諸侯合從翕而出不意此乃知伯夫差湣王之所
以亡也願大王無愛財物賂其豪臣以亂其謀不過亡
三十萬金則諸侯可盡王用其計見繚亢禮衣服飲食
與繚同繚曰秦王為人蜂準長目摯鳥膺豺聲少恩而
虎狼心居約易出人下得志亦輕食人我布衣然見我
常身自下我誠使秦王得志於天下天下皆為虜矣不

可與久游乃亡去秦王覺固止之以為國尉卒用其計
策十一年呂不韋出之河南王翦桓齮楊端和攻鄴取
九城王翦攻閼與掠陽皆并為一軍翦將十八日軍歸
斗食以下什推二人從軍取鄴安陽桓齮將十二年呂
不韋死竊葬其舍人臨者晉人也逐出之秦人奪爵遷
自今以來操國事不道如嫪毐不韋者籍其門視此秋
復嫪毐舍人遷蜀者天下大旱六月至八月乃雨十三
年桓齮攻趙平陽殺趙將扈輒斬首十萬王之河南正月

彗星見東方十月桓齮攻趙十四年攻趙軍於平陽取
宜安破之殺其將軍桓齮定平陽武城韓使非來使王
用李斯計留非非死雲陽韓王請為臣十五年大興兵
一軍至鄴一軍至太原取狼孟地動十六年九月發卒
受韓南陽地初令男子書年魏獻地於秦置麗邑十七
年內史騰攻韓得王安盡納其地為潁川郡地動華陽
太后卒民大饑十八年大興兵攻趙王翦將上地下井
陘端和將河內羗槐伐趙端和圍邯鄲城十九年王翦

羗癭盡取趙地得趙王引兵欲攻燕屯中山王之邯鄲
諸嘗與王母家有仇怨皆阮之王歸自趙王母太后卒
趙公子嘉率其宗數百人代之自立為代王東與燕合
兵軍上谷大饑二十年燕太子丹患秦兵至國恐使荆
軻來刺王王覺之體解軻以徇而使王翦卒勝攻燕燕
代發兵擊秦軍秦軍破燕易水之西三十一年益發卒
詣王翦遂破燕太子丹軍取燕薊城得太子丹之首燕
王東收遼東而王之李信蒙恬攻荆王翦謝病老歸新

鄭反昌平君徙於郢大雨雪深二尺五寸二十二年王
賁攻魏引河溝灌大梁大梁城壞梁王請降盡取其地
李信蒙恬大破荆軍荆人隨之三日三夜不頓舍大破
李信軍二十三年秦王復召王翦強起之使將擊荆取
陳以南至平輿虜荆王秦王游至郢陳荆將項燕立昌
平君為荆王以江南距秦二十四年王翦蒙武破荆軍
昌平君死項燕自殺二十五年大興兵使王賁攻燕遼
東得燕王喜還攻代虜代王嘉王翦遂定荆江南地降

越君置會稽郡五月天下大酺二十六年齊王建與其
相后勝發兵守其西界不通秦使王賁從燕南攻齊得齊
王建秦初并天下令丞相御史曰異日韓王納地效璽
請為藩臣已而背約與趙魏合從畔秦故興兵誅之虜
其王寡人以為善庶幾息兵草趙王使其相李牧來約
盟故歸其質子已而倍盟反我太原故興兵誅之得其
王趙公子嘉乃自立為代王故舉兵擊滅之魏王始約
服入秦已而與韓趙謀襲秦秦兵吏誅遂破之荆王獻

青陽以西而畔約擊我南郡故發兵誅得其王遂定荆
地燕王昏亂其太子丹乃陰令荆軻為賊兵吏誅滅其
國齊王用后勝計絕秦使欲為亂兵吏誅虜其王平齊
地寡人以眇眇之身興兵誅暴亂賴宗廟之靈六王咸
服其辜天下大定今名號不更無以稱成功傳後世其
議帝號丞相綰御史大夫却廷尉斯等皆曰昔者五帝
地方千里其外侯服夷服諸侯咸朝或否天子不能制
今陛下興義兵誅殘賊平定天下海內為郡縣法令由

一統自上古以來未嘗有五帝所不及臣等謹與博士
議曰古有天皇有地皇有泰皇泰皇最貴臣等昧死上
尊號王為泰皇命為制令為詔天子自稱曰朕王曰去
泰著皇采上古帝位號號曰皇帝它如議制曰可追尊
莊襄王為太上皇制曰朕聞太古有號無謚中古有號
死而以行為謚如此則子議父臣議君也甚無謂朕弗
取焉自今以來除謚法朕為始皇帝後世以計數二世
三世至于萬世傳之無窮始皇推終始五德之傳以為

周得火德秦代周德從所不勝方今水德之始建正朝
會皆以十月朔衣服旌旄節旗皆上黑數以六為紀符
法冠皆六寸輿六尺六尺為步乘六馬更名河曰德水
以為水德之治剛毅戾深事皆決於法刻削毋仁恩和
義然後合五德之數於是急法久者不赦丞相綰等言
諸侯初破燕齊荆地遠不為置王毋以填之請立諸子
唯上幸許始皇下其議於羣臣羣臣皆以為便廷尉李
斯議曰周文武所封子弟同姓甚衆然後屬䟽遠相攻

擊如仇讎諸侯更相誅伐周天子不能禁止今海內賴
陛下神靈一統皆為郡縣諸子功臣以公賦稅重賞賜
之甚足易制天下無異意則安寧之術也置諸侯不便
始皇曰天下共苦戰鬪不休以有侯王賴宗廟天下初
定又復立國是樹兵也而求其寧息豈不難哉廷尉議
是分天下以為三十六郡郡置守尉監更名民曰黔首
大酺收天下兵聚之咸陽銷以為鐘鐻金人十二重各
千石置宮廷中一法度衡石丈尺車同制書同文字地

東至海暨朝鮮西至臨洮羗中南至北嚮戶北據河為
塞並陰山至遼東徙天下豪富於咸陽十二萬戶諸廟
及章臺上林皆在渭南秦每破諸侯放其宮室作之咸
陽北坂上南臨渭自雍門以東至涇渭殿屋複道周閣
相屬所得諸侯美人鐘鼓以充入之二十七年始皇巡
隴西北地出鷄頭山過回中作信宮渭南已而更名極
廟象天極築甬道自咸陽屬之驪山賜民爵一級治天
下馳道二十八年始皇東行郡縣上鄒嶧山立石刻頌

秦德與魯諸儒生議封禪事遂登封太山下遇暴風雨
休於樹下因封其樹為五大夫禪梁父刻所立石其詞
曰皇帝臨位作制明法臣下修飭二十有六年初并天
下罔不賓服親巡遠方黎民登茲太山周覽東極從臣
思迹本原事業祇誦功德治道運行諸產得宜皆有法
式大業休明垂于後世順承勿革皇帝躬聖既平天下
不懈於治夙興夜寐建設長利專隆教誨訓經宣達遠
近畢理咸承聖志貴賤分明男女禮順慎遵職事昭融

內外靡不清淨施于後嗣化及無窮遵奉遺詔永承重
戒於是並勃海以東過黃腫窮成山登之果立石頌秦
德而去南登琅邪大樂之留三月乃徙黔首三萬戶琅
邪臺下復十二歲作琅邪臺立石刻頌秦德明得意曰
維二十六年皇帝作始端平法度萬物之紀以明人事
合同父子聖知仁義顯白首理東撫東上以省卒士事
已大畢乃臨于海皇帝之功勤勞本事上農除末黔首
是富普天之下傳心揖志器械一量同書文字日月所

照舟輿所載皆終其命莫不得意應時動事是維皇帝
匡飭異俗陵水經地憂恤黔首朝夕不懈除疑定法咸
知所辟方伯分職諸治經易舉措必當莫不如畫皇帝
之明臨察四方尊卑貴賤不逾次行姦邪不容皆務貞
良細大盡力莫敢怠荒遠邇辟隱專務肅莊端直敦忠
事業有常皇帝之德存定四極誅亂除害興利致福節
事以時諸產繁殖黔首安寧不用兵革六親相保終無
寇賊驩欣奉教盡如法式六合之內皇帝之土西涉流

沙南盡北戶東有東海北過大夏人迹所至無不臣者
功蓋五帝澤及牛馬莫不受德各安其宇維秦王兼有
天下立名為皇帝乃撫東土至於琅邪列侯武成侯王
離列侯通武侯王賁倫侯建成侯趙亥倫侯昌武侯成
倫侯武信侯馮毋擇丞相隗林顏之推云隋開皇中得
古稱權有銘云始皇時
量器丞相隗狀王綰二
人列名今云隗林恐誤丞相王綰卿李斯卿王戊五大
夫趙嬰五大夫楊樛從與議於海上曰古之帝者地不
過千里諸侯各守其封域或朝或否相侵暴亂殘伐不

止猶刻金石以自為紀古之五帝三王知教不同法度
不明假威鬼神以欺遠方實不稱名故不久長其身未
沒諸侯背叛法令不行今皇帝并一海內以為郡縣天
下和平昭明宗廟體道行德尊號大成羣臣相與頌皇
帝功德刻於金石以為表經既已齊人徐市等言海中
有三神山名曰蓬萊方丈瀛州僊人居之請得齋戒與
童男女求之於是遣徐市發童男女數千人入海求僊
人始皇還過彭城齋戒禱祀欲出周鼎泗水使千人沒

水求之弗得乃西南渡淮水之衡山南郡浮江至湘山
祠逢大風幾不得渡始皇問博士湘君何神博士對曰
聞之堯女舜之妻而葬此始皇大怒使刑徒三千人伐
湘山樹赭其山自南郡由武關歸二十九年始皇東游
至陽武博狼沙中為盜所驚求弗得乃令天下大索十
日登之果刻石其辭曰維二十九年時在中春陽和方
起皇帝東游巡登之果臨照於海從臣嘉觀原念休烈
追誦本始大聖作治建定法度顯著綱紀外教諸侯光

施文惠明以義理六國回辟貪戾無厭虐殺不已皇帝
哀衆遂發討師奮揚武德義誅信行威憚旁達莫不賓
服烹滅強暴振救黔首周定四極普施明法經緯天下
永為儀則大矣哉宇縣之中承順聖意羣臣誦功請刻
于石表垂于常式其東觀曰維二十九年皇帝春游覽
省遠方逮于海隅遂登之杲昭臨朝陽觀望廣麗從臣
咸念原道至明聖法初興清理疆內外誅暴強武威旁
暢振動四極禽滅六王闡并天下留害絕息永偃戎兵

皇帝明德經理宇內視聽不怠作立大義昭設備器咸
有章旗職臣遵分各知所行事無嫌疑黔首改化遠邇
同度臨古絕尤常職既定後嗣循業長承聖治羣臣嘉
德祇誦聖烈請刻之果遂之琅邪道上黨入三十年三
十一年十二月更名臘曰嘉平賜黔首里六石米二羊
始皇為微行咸陽與武士四人俱夜出逢盜蘭池見窘
武士擊殺盜闕中大索二十日米石千六百三十二年
始皇之碣石使燕人盧生求羨門刻碣石門其辭曰遂

興師旅誅戮無道為逆滅息武珍暴逆文復無罪庶心
咸服惠論功勞賞及牛馬恩肥土域皇帝奮威德并諸
侯初一泰平墮壞城郭決通川防夷去嶮岨地勢既定
黎庶無繇天下咸撫男樂其疇女修其業事各有敘惠
被諸產久並來田莫不安所羣臣誦烈請刻此石垂著
儀矩因使韓終侯公石生求仙人不死之藥巡北邊從
上郡入盧生使入海還言鬼神事因奏錄圖書曰亡秦
者胡也始皇乃使蒙恬發兵三十萬人北擊胡略取河

南地三十三年發諸嘗逋亡人贅壻賈人略取陸梁地
為桂林象郡南海以適遣戍西北斥逐匈奴自榆中並
河以東屬之陰山為三十四縣城河上為塞又使蒙恬
渡河取高闕陶山北假中築亭障以逐戎人徙謫實初
縣禁不得祠明星出西方三十四年適治獄吏不直者
築長城及南越地始皇置酒咸陽宮博士七十人前為
壽僕射周青臣進頌曰佗時秦地不過千里賴陛下神
靈明聖平定海內放逐蠻夷日月所照莫不賓服以諸

侯為郡縣人人自安樂無戰爭之患傳之萬世自上古
不及陛下威德始皇悅博士齊人淳于越進曰臣聞殷
周之王千餘歲封子弟功臣自為枝輔今陛下有海內
而子弟為匹夫卒有田常六卿之臣無輔拂何以相救
哉事不師古而能長久者非所聞也周青臣又面諛以
重陛下之過非忠臣始皇下其議丞相李斯曰五帝不
相復三代不相襲各以治非其相反時變異也今陛下
創大業建萬世之功固非愚儒所知且越乃言三代事

何足法也異時諸侯並爭厚招游學今天下已定法令
出一百姓當家則力農工士則學習法令辟禁今諸生
不師今而學古以非當世惑亂黔首丞相臣斯昧死言
古者天下散亂莫之能一是以諸侯並作語皆道古以
害今飾虛言以亂實人善其所私學以非上之所建立
今皇帝并有天下別白黑而定一尊私學乃相與非法
教人聞令下則各以其學議之入則心非出則巷議夸
主以為名異取以為高率羣下以造謗如此弗禁則主

勢降乎上黨與成乎下禁之便臣請史官非秦記皆燒
之非博士官所職天下敢有藏詩書百家語者悉詣守
尉雜燒之有敢偶語詩書棄市以古非今者族吏見知
不舉者與同罪令下三十日不燒黥為城旦所不去者
醫藥卜筮種樹之書有欲學法令以吏為師制曰可三
十五年除道道九原抵雲陽塹山堙谷直通之於是始
皇以為咸陽人多而先王之宮廷小吾聞周文王都豐
武王都鎬豐鎬之間帝王之都也乃營作朝宮渭南上

林苑中先作殿阿房東西五百步南北五十丈上可以坐萬人下可以建五丈旗周馳為閣道自殿下直抵南山表南山之巔以為復道自阿房渡渭屬之咸陽以象天極閣道絕漢抵營室也阿房宮未成成欲更擇令名名之作宮阿房故天下謂之阿房宮隱宮徒刑者七十餘萬人分作阿房宮或作麗山發北山石下蜀荆之材皆至關中計宮三百關外四百餘立石東海上胸界中以為秦東門徒三萬家麗邑五萬家雲陽皆復不事十

歲盧生說始皇曰臣等求芝竒藥仙者常弗遇類物有
害之者人主宜時為微行以辟惡鬼惡鬼辟真人至人
主所居而人臣知之則害於神真人者入水不濡入火
不熱陵雲氣與天地長久今上治天下未能恬淡願上
所居宮毋令人知之然後不死之藥殆可得也於是始
皇曰吾慕真人自謂真人不稱朕令咸陽旁二百里內
宮觀二百七十復道角道相連帷帳鐘鼓美人不移而
具行所幸有言其處者罪死嘗幸梁山宮從山上見丞

相車馬衆弗善也中人或言丞相丞相後損車騎始皇怒曰此中人泄吾語案問莫服詔捕時在側者皆殺之自是莫知行之所在凡聽事及羣臣受決事悉於咸陽宮廬生侯生相與謀曰始皇為人天性剛戾自用起諸侯并天下意得欲從以為自古莫及已專任獄吏獄吏得親幸博士雖七十人特備員弗用丞相諸大臣皆受成事倚辦於上上樂以刑殺為威天下畏罪持祿莫敢盡忠上不聞過而日驕下攝伏謾欺以取容秦法不得

兼方不驗輒死然候星氣者至三百人皆良士畏忌諱
諛不敢盡言其過天下事無大小皆決於上上至以衡
石量書日夜有程不中程不息貪於權勢至如此未可
為求仙藥於是亡去始皇聞之大怒曰吾前收天下書
不中用者去之悉召文學士欲以興太平方士欲練以
求奇藥今聞韓衆去不報徐市等費以巨萬計終不得
藥徒奸利相告日聞盧生等吾尊賜之甚厚今乃誹謗
我以重吾不德諸生在咸陽者吾使人廉問或為妖言

以亂黔首於是使御史悉按問諸生諸生傳相告引乃
自除犯禁者四百六十餘人皆坑之咸陽使天下知之
以懲後益發謫徙邊長子扶蘇諫曰天下初定遠方黔
首未集諸生皆誦法孔子今重法繩之恐天下不安始
皇怒使扶蘇北監蒙恬於上郡三十六年熒惑守心星
隕東郡至地為石或刻其上曰始皇帝死而地分始皇
聞之遣御史逐問莫服盡取石旁居人誅之而燔銷其
石始皇不樂使博士為仙真人詩及行所游令樂人歌

弦之秋使者從關東夜過華陰平舒道有人持璧遮使者曰為吾遺滹池君因言曰今年祖龍死使者問其故忽不見置其璧去使者奉璧具以聞始皇默然良久曰山鬼固不過知一歲事也退言曰祖龍者人之先也使御府視璧乃二十八年行渡江所沉璧也始皇卜之卦得游徙吉遷河北榆中三萬家拜爵一級三十七年十月癸丑始皇出游左丞相斯從右丞相去疾守少子胡亥愛慕請從許之十一月行至雲夢望祀虞帝於九疑

浮江以觀藉柯渡海渚過丹陽至錢唐臨浙江水波惡
乃西百二十里從狹中渡上會稽祭大禹望於南海而
立石刻頌秦德其文曰皇帝休烈平一字內德惠脩長
三十有七年親巡天下周覽遠方遂登會稽宣省習俗
黔首齊莊羣臣誦功本原事迹追道高明秦聖臨國始
定刑名顯烈舊章初平法式審別職任以立恒常六王
專倍貪戾傲盈率衆自強暴虐恣行負力而驕數動甲
兵陰通間使以事合從行為辟方內飾詐謀外來侵邊

遂起禍殃義威誅之殄息暴悖亂賊滅亡聖德廣密六合之中被澤無疆皇帝并宇兼聽萬事遠近畢清運理羣物考驗事實各載其名貴賤並通善否陳前靡有隱情飾省宣義有子而嫁倍死不貞防隔內外禁止淫泆男女絜誠夫為寄殲殺之無罪男秉義程妻為逃嫁子不得母咸化廉清大治濯俗天下承風蒙被休經皆遵度軌和安敦勉莫不順令黔首修絜人樂同則嘉保太平後敬奉法常治無極輿舟不傾從臣誦烈請刻此石

光垂休銘還過吳從江乘渡並海上北至琅邪方士徐市等入海求神藥數歲不得費多恐譴乃詐曰蓬萊藥可得然常為大鯨魚所苦故不得至願請善射與俱見則以連弩射之始皇夢與海神戰如人狀問占夢博士曰水神不可見以大魚鯨龍為候今上禱祀備謹而有此惡神當除去而善神可致乃令入海者齋捕巨魚具而自以連弩候大魚出射之自琅邪北至榮成山弗見至之杲見巨魚射殺一魚遂並海西自平原津而病始

皇惡言病羣臣莫敢言死事上病益甚乃為璽書賜公
子扶蘇曰與喪會咸陽而葬書已封在中車府令趙高
行符璽事所未授使者七月丙寅始皇崩於沙邱平臺
丞相斯為帝崩在外恐諸公子及天下有變乃祕不發
喪棺載輜輶車中故幸宦者參乘所至上食百官奏事
如故宦者輒從車中可其奏事獨子胡亥趙高及所幸
宦者五六人知之趙高故嘗教胡亥書及獄律令事胡
亥私幸之高乃與公子胡亥及丞相斯陰謀破去始皇

所封書賜公子扶蘇者而更詐為丞相斯受始皇遺詔沙丘立子胡亥為太子更為書賜公子扶蘇蒙恬數以罪賜死行從井陘抵九原會暑輜車臭乃詔從官車載一石鮑魚以亂之行從直道至咸陽發喪太子胡亥襲位為二世皇帝九月葬始皇酈山始皇初即位穿治酈山及并天下天下送徒七十餘萬人穿三泉下銅而致傳宮觀百官奇器珍怪藏滿其中令匠作機弩矢有所穿近輒射之以水銀為百川河海機相貫輪上具天文下具

地理以人魚膏為燭度木臧者久之二世曰先帝後宮
非有子者出焉不宜皆令從死死死者甚衆葬既下或言
匠為機臧恐後泄大事皆閉之外羨中無復出者樹草
木以象山二世皇帝元年二十一年趙高為郎中令任
用事二世下詔增始皇寢廟犧牲及山川百祀之禮令
羣臣議尊始皇廟羣臣皆頓首言曰古者天子七廟諸
侯五大夫三今始皇為極廟四海之內咸獻貢職增犧
牲禮咸備無以加先王廟或在雍或在咸陽天子當獨

奉酌祠始皇廟自襄公以下軼毀所置凡七廟羣臣以禮進祠尊始皇為帝者祖廟皇帝復自稱朕二世與趙高謀曰朕年少初即位黔首未附先帝巡行海內以示強威服海內今晏然不巡行即見弱毋以臣畜天下春二世東行郡縣李斯從到碣石並海南至會稽盡刻始皇所立刻石旁著大臣從者名以章先帝成功盛德焉遂至遼東而還於是二世乃遵用趙高申法令陰與高謀曰大臣不服官吏尚強及諸公子必與我爭為之奈

何高曰臣固願言而未敢也先帝大臣皆天下累世名貴人也積功勞世以相傳久矣今高素賤陛下幸稱舉令在上位管中事大臣鞅鞅特以貌從臣心實不服今上出不因此時案郡縣守尉有罪者誅之上以振威天下下以除去上平生所不可者今時不師文而決於武力願陛下遂從時無疑即羣臣不及謀明主收餘民賤者貴之貧者富之遠者近之則上下集而國安矣二世曰善乃行誅大臣及諸公子以罪過連逮近官三郎無

得立者而六公子戮死於杜公子將閭昆弟三人囚於
內宮議其罪獨後二世使使令將閭曰公子不臣罪當
死吏致法焉將閭曰闕廷之禮吾未嘗敢不從賓贊也
廊廟之位吾未嘗敢失節也受命應對吾未嘗敢失詞
也何謂不臣願聞罪而死使者曰臣不得與謀奉書從
事將閭仰天大呼天者三曰天乎吾無罪昆弟三人皆
流涕拔劍自殺宗室振恐羣臣諫者以為誹謗遏過者
為妖言黔首振恐四月還至咸陽曰先帝為咸陽朝廷

小故營阿房宮未就而崩罷其作者復土鄠山鄠山事
大畢今釋阿房弗就是章先帝過也復作阿房宮外撫
四夷如始皇計徵材士五萬人為屯衛教射咸陽狗馬
禽獸當食者多度不足下調郡縣轉輸菽粟芻藁皆令
自齎糧食咸陽三百里內不得食其穀用法益刻深七
月戌卒陳勝等反故荆地為張楚勝自立為楚王居陳
遣諸將徇地山東郡縣少年苦秦吏皆殺其守尉令丞
反以應涉相立為侯王合從西鄉名為伐秦不可勝數

也謁者使東方來以反者聞二世怒下吏後使者至二世問之對曰羣盜不足憂郡守尉方逐捕且盡乃悅武臣自立為趙王魏咎為魏王田儋為齊王沛公起沛項梁起會稽二年冬陳涉將周章等西至戲兵數十萬二世大驚與羣臣謀少府章邯曰盜已至衆強今發近縣不及矣酈山徒多請赦之授兵以擊之乃大赦天下使章邯將擊破周章軍章走殺之曹陽二世益使長史司馬欣董翳佐邯擊盜殺陳勝城父破項梁定陶滅魏咎

臨濟楚地名將已死章邯乃北渡河擊趙王歇於鉅鹿
趙高說二世曰先帝臨制天下久故羣臣不敢為非進
邪說今陛下富於春秋即位柰何與公卿廷決事事即
有誤示羣臣短也天子稱朕固不聞聲於是二世常居
禁中與高決諸事公卿希得朝見盜賊益多而關中卒
發東擊盜者毋已右丞相去疾左丞相斯將軍馮劫進
諫曰關東羣盜並起秦發兵誅擊所殺亡甚衆然猶不
止皆以戍漕轉作事苦賦稅大也請且止阿房宮作者

減省四邊戍轉二世曰吾聞之韓子曰堯舜米祿不刮
茅茨不翦飯土塼啜土刑雖監門之養不穀於此禹鑿
龍門通大夏決河亭水放之海自持築市脛無毛臣虜
之勞不烈於此矣凡所為貴有天下者得肆意極欲主
重明法下不敢為非以制御海內也夫虞夏之主貴為
天子親處窮苦之實以循百姓尚何於法朕尊萬乘無
其實吾欲造千乘之駕萬乘之屬充吾號名且先帝起
諸侯兼天下天下已定外攘四夷以安邊境作宮室以

章得意而君觀先帝功業有緒今朕即位二年之間羣盜並起君不能禁又欲罷先帝之所為是上毋以報先帝次不為朕盡忠力何以在位下去疾斯却吏案責它罪去疾却曰將相不辱自殺斯獨囚趙高為丞相案斯具五刑殺之三年章邯等圍鉅鹿楚上將軍項羽救趙邯等戰數却二世使人讓邯邯恐使長史欣請事趙高弗見又弗信欣恐亡去高使人捕追不及欣見邯曰趙高用事於中將軍有功亦誅無功亦誅項羽急擊秦軍

虜王離邯等遂以兵降諸侯八月己亥趙高欲為亂恐羣臣不聽乃先設驗持鹿獻於二世曰馬也二世笑曰丞相誤邪謂為馬問左右左右或默然或言馬以阿順趙高或言鹿者高因陰中以法後羣臣皆畏高高前數言關東盜毋能為也及章邯等兵數却上書請益助燕趙齊楚韓魏皆自立為王自關以東大氐盡畔諸侯率衆西鄉沛公將數萬人已至武關使人私於高高恐二世怒誅及其身乃謝病不朝見二世夢白虎齧其左驂

殺之心不樂以問占夢曰涇水為祟二世乃齋於望夷宮欲祠涇沉四白馬使使責讓高以盜賊事高懼乃陰與其婿咸陽令閭樂其弟趙成謀曰上不聽諫今事急欲歸禍吾宗吾欲易置上更立公子嬰子嬰仁儉百姓皆載其言乃詐為有大賊令樂召吏發卒使郎中令為內應追劫樂毋置高舍遣樂將吏卒千餘人至望夷宮殿門縛衛令僕射曰賊入此何不止衛令曰周廬設卒甚謹安得賊敢入宮樂遂斬衛令直將吏入行射郎宦

者皆大驚或走或格格者輒死死數十人郎中令與樂俱入射上幄坐幃二世怒召左右左右皆惶擾不闕旁有宦者一人侍不敢去二世入謂曰公何不蚤告我乃至於此宦者曰臣不敢言故得全使臣蚤言皆已誅安得至今閭樂前數二世曰足下驕恣誅殺無道天下共畔足下足下其自為計二世曰丞相可得見否樂曰不可二世曰吾願得一郡為王弗許又曰願為萬戶侯弗許曰願與妻子為黔首比諸公子樂曰臣受命於丞

相為天下誅足下足下雖多言臣不敢報麾其兵進二世自殺趙高乃悉召諸大臣公子告以誅二世之狀曰秦故王國始皇君天下故稱帝今六國復自立秦地益小乃以空名為帝不可宜為王如故便立二世之兄子公子嬰為秦王以黔首葬二世杜南宜春苑中令子嬰齋當廟見受玉璽齋五日子嬰與其子二人謀曰丞相高殺二世望夷宮恐羣臣誅之乃佯以義立我我聞高乃與楚約滅秦宗室而王關中今使我齋見廟此欲因廟中

殺我耳我稱病不行高必自來來則殺之高使人請子
嬰數輩子嬰不行高果自往曰宗廟重事王奈何不行
子嬰遂刺殺高於齋宮三族高家以徇咸陽子嬰為秦
王四十六日沛公破秦軍入武關遂至霸上使人約降
子嬰子嬰係頸以組白馬素車奉天子璽符降軹道旁
沛公遂入咸陽封宮室府庫還軍霸上居月餘諸侯兵
至項籍為從長殺子嬰及秦諸公子宗族遂屠咸陽燒
其宮室虜其子女收其珍寶貨財分其地為三封秦降

將章邯為雍王司馬欣為塞王董翳為翟王號曰三秦
項羽為西楚霸王主命分天下王諸侯後五年天下定
於漢


蘇子曰諸侯之興自生民始矣至始皇滅六國而五帝
三代之諸侯埽地無復遺者非秦能滅諸侯而勢之隆
汙極於此矣昔禹會諸侯於塗山執玉帛者萬國傳商
及周文武之間止千七百餘國夫人之必爭強弱之必
相吞滅此勢之必至者也彼非諸侯獨能自存聖賢之

君時出而齊之是以強者不敢肆弱者有以自立蓋自禹五世而得少康自少康十二世而得湯自湯六世而得大戊自大戊十三世而得武丁自武丁八世而得周文武當是時雖有強暴諸侯不得以力加小弱然虞夏諸侯亡者已十八九矣自文武成康以來三十有三世獨一宣王能紀綱諸夏幽平以後諸侯放恣春秋之際存者百七十餘國而已雖齊桓晉文迭興以會盟征伐持之而道德不足其身所攻滅蓋已多矣陵遲至於六

國獨有宋衛中山泗上諸侯在耳地大兵強皆務以詐力相傾雖使桓文復生號令將有所不行非有盛德之君不足以懷之矣是以至於蕩滅無餘而後止秦雖欲復立諸侯豈可得哉而議者乃追咎李斯不師古始使秦孤立無援二世而亡蓋未之思歟夫商周之初雖封建功臣子弟而上古諸侯基布天下植根深固是以新故相維勢如犬牙數世之後皆為故國不可復動今秦已削平諸侯蕩然無復立錐之國雖使並建子弟而君

民不親譬如措舟滄海之上大風一作漂卷而去與秦之郡縣何異且獨不見漢高晉武之事乎割裂海內以封諸將諸子大者連城數十舉無根之人寄之萬民之上十數年之間隨即散滅不獲其用豈非惑於其名而未察其勢也哉古之聖人立法以御天下必觀其勢勢之所去不可強反今秦之郡縣豈非勢之自至也歟然秦得其勢而不免於滅亡蓋治天下在德不在勢誠能因勢以立法務德以扶勢未有不安且治者也使秦既

一天下與民休息寬繇賦省刑罰黜奢淫崇儉約選任
忠良放遠法吏而以郡縣治之雖與三代比隆可也



古史卷七

欽定四庫全書

史部

古史卷八至
十

詳校官編修_臣溫汝适

編修_臣裴謙覆勘

覆校官庶吉士_臣方燁

校對官檢討_臣王鍾健

謄錄監生_臣左詢

欽定四庫全書

古史卷八

宋 蘇轍 撰

吳太伯世家第一

吳太伯太伯弟仲雍皆周太王之子而王季歷之兄也
季歷賢而有聖子昌太王欲立之於是太伯仲雍二人
逃奔荊蠻以避季歷季歷立爲王季而昌爲文王太伯
之奔荊蠻自號句吳荊蠻義之從而歸之千餘家立爲
吳太伯太伯卒無子弟仲雍立仲雍斷髮文身羸以爲

飾以從荆蠻之俗

左傳吳太宰嚭謂子貢曰國君道長而大夫不出門此何禮也子貢對曰

太伯端委以治吳仲雍嗣之斷髮文身羸以爲飾豈禮也哉有由然也太史公曰太伯斷髮文身示不可用失

之仲雍卒子季簡立季簡卒子叔達立叔達卒子周章

立是時周武王克殷求太伯仲雍之後得周章周章已

君吳因而封之乃封周章之弟於周之北故夏墟是爲

虞仲列爲諸侯

語曰虞仲夷逸宮之奇云太伯虞仲太王之昭則仲雍號虞仲矣今周章之弟

亦號虞仲虞其國仲其字故爾然則仲雍之號虞仲抑以其後封虞故耶

周章卒子熊遂立

熊遂卒子柯相立柯相卒子強鳩夷立強鳩夷卒子餘

橋疑吾立餘橋疑吾卒子柯盧立柯盧卒子周繇立周繇卒子屈羽立屈羽卒子夷吾立夷吾卒子禽處立禽處卒子轉立轉卒子頗高立頗高卒子句卑立是時晉獻公賂周北虞公假道以滅虢因以滅虞句卑卒子去齊立去齊卒子壽夢立壽夢始大稱王自太伯作吳五世而武王克殷封其後爲二其一吳在蠻夷其一虞在中國十二世而晉滅中國之虞中國之虞滅一世而蠻夷之吳興蓋壽夢以前常役屬於楚楚大夫申公巫臣

與其令尹嬰齊爭田與其司馬側爭夏姬出奔晉楚莊
王卒嬰齊側殺巫臣之族而分其室巫臣怨之王壽夢
二年巫臣請於晉侯而使於吳壽夢說之乃通吳於晉以
兩之一卒適吳舍偏兩之一馬教吳用兵乘車使其子
狐庸爲吳行人教之畔楚吳始伐楚伐巢伐徐入州來
見於春秋十年會諸侯于鍾離十六年楚嬰齊伐我克
鳩茲至于衡山我獲其將鄧廖復伐楚取駕嬰齊遂以
憂死十八年使壽越如晉晉悼公使魯衛先會我善道

遂會諸侯于戚二十五年王壽夢卒子諸樊立楚共王
卒吳因其喪伐之戰于庸浦我師大敗獲我公子黨王
諸樊二年會諸侯于向晉將爲我謀楚其大夫士句不
義我伐楚喪而止初王壽夢有子四人長曰諸樊次曰
餘祭次曰夷昧次曰季札季札賢壽夢欲立之季札讓
不可故立諸樊諸樊既除喪將立季札季札辭曰曹宣
公之卒也曹人不義曹君將立子臧子臧去之以成曹
君君子曰能守節君義嗣也誰敢奸君有國非吾節也

札雖不才願附於子臧以無失節固立之棄其室而耕
乃舍之秋楚公子貞伐吳吳擊之獲公子宜穀十二年
楚爲舟師以伐吳無功而還吳召舒鳩人畔楚十三年
楚屈建伐舒鳩吳救之敗焉楚遂滅舒鳩十二月諸樊
伐楚門于巢巢牛臣曰吳王勇而輕若啓之將親門我
獲射之必殪諸樊門焉牛臣射之卒有命立弟餘祭欲
以次必致國於季子以稱先王壽夢之意王餘祭三年
齊慶封有罪自魯來奔封之朱方四年伐越獲俘以爲

閻使守舟餘祭觀舟閻弑之弟夷昧立

史記餘祭十七年而後夷昧立

蓋失不考之春秋也

使季札聘於諸侯凡諸侯之賢者札無不友

也王夷昧二年使屈狐庸聘于晉六年楚靈王合諸侯于申遂以諸侯伐吳圍朱方執齊慶封殺之而盡滅其族冬吳伐楚入棘櫟麻以報七年楚人復以諸侯伐吳吳敗楚師于鵲岸楚王以駟至於羅汭吳使蹶由犒師楚人執之楚師及汝清吳有備楚無功而還八年楚遂洩伐徐吳救之敗楚師於房鐘獲宮廐尹棄疾十四年

楚靈王次于乾谿遣兵圍徐以懼吳十五年楚棄疾入
楚靈王死楚師還自徐吳敗之豫章獲其五帥冬吳滅
州來楚平王初立不敢爭十七年王夷昧卒欲立季札
季札逃去吳人立夷昧之子僚王僚二年使公子光伐
楚戰于長岸吳師大敗喪其乘舟餘皇楚人塹而守之
光使長鬣者三人伏於舟側曰我呼餘皇則對師夜從
之三呼皆迭對楚人從而殺之楚師亂吳人大敗之取
餘皇而歸四年楚城州來楚歸蹶由五年楚平王以讒

逐其太子建誅太子之師伍奢奢子負奔吳言伐楚之
利公子光曰是宗爲戮而欲反其讎不可從也負曰光
將有他志余姑爲之求士而鄙以待之乃見鱄設諸而
耕於野公子光者王諸樊之子也常以爲若兄弟相授
則季子當立季子不立則長子之子當立者也故陰養
士欲襲王僚八年吳伐州來楚遠越帥師及諸侯之師
救之公子光敗頓胡沈蔡之師于雞父胡子髡沈子逞
滅獲陳夏齧楚師大奔九年楚爲舟師以略吳疆吳人

踵之遂滅巢及鍾離十一年楚平王卒十二年王僚欲
因楚喪而伐之使其母弟掩餘燭庸率師伐楚圍潛使
季子聘于上國以觀諸侯楚人禦之楚師強吳師不能
退公子光曰此時也不可失也謂鱄設諸曰我王嗣也
事若克季子雖至不吾廢也鱄設諸曰王可弑也母老
子弱是無若我何四月光伏甲於窟室而享王王亦以
甲爲衛光僞足疾入于窟室使鱄設諸置劍於魚中以
進抽劍刺王弑之王屬亦殺鱄設諸公子光自立是爲

王闔閭以鱄設諸之子爲卿季子至曰苟先君無廢祀
人民無廢主社稷有奉國家無傾乃吾君也吾誰敢怨
哀死事先以待天命非我生亂立者從之先人之道也
復命哭墓復位而待掩餘奔徐燭庸奔鍾吾楚殺郤宛
伯州犂之孫嚭亡奔吳吳以爲太宰王闔閭元年舉伍
負以爲行人三年闔閭使徐人執掩餘使鍾吾人執燭
庸二公子奔楚楚人封之於養將以害吳闔閭怒執鍾
吾子而伐徐滅之闔閭問於伍負曰初而言伐楚余知

其可也而恐其使余往也又惡人之有余之功也今余將自有之矣伐楚何如對曰楚執政衆而乖莫適任患若爲三師以肄焉一師至彼必皆出彼出則歸彼歸則出楚必道敝亟肄以罷之多方以誤之既罷而後以三軍繼之必大克之闔閭從之四年侵楚伐夷侵潛六楚沈尹戌帥師救潛吳師還楚師遷潛於南岡而還吳師圍弦左司馬戍右司馬稽帥師救弦及豫章吳師還始用伍員之謀也五年吳始用師於越晉史墨曰歲及三

紀越其有吳乎越得歲而吳伐之必受其凶七年桐叛
楚闔閭使舒鳩氏誘楚人僞畏楚爲之伐桐敗楚師于
豫章圍巢克之獲公子繁八年蔡昭侯如楚楚令尹囊
瓦欲其裘與佩弗予唐成公如楚瓦欲其驪驪馬亦弗
與皆三年止之蔡侯歸如晉請伐楚晉人求賂於蔡弗
得而止蔡侯因伍負伯嚭以其子乾與大夫之子爲質
於吳以謀楚九年闔閭從蔡侯唐人以伐楚楚瓦禦之
陳于柏舉闔閭之弟夫槩王欲戰言於王曰楚楚瓦不仁

其臣莫有死志先伐之必克王弗許夫槩王曰臣義而行不待命可也以其屬先擊瓦瓦之卒奔吳師大敗之五戰及郢楚昭王出奔隨吳入郢以班處宮子山處令尹之宮夫槩王欲攻之懼而去之夫槩王入之十年越入吳秦遣兵救楚楚師及秦師大敗夫槩王于沂吳師屢奔夫槩王歸自立闔閭乃歸夫槩王與王戰敗奔楚爲堂谿氏十一年吳太子終累敗楚舟師獲潘子臣小惟子及大夫七人楚大懼遷郢都都十九年吳伐越越

子句踐禦之陳于檣李吳師敗靈姑浮以戈擊闔閭闔閭傷將指取其一屨還卒於陘子夫差立使人立於庭苟出入必謂已曰夫差而忘越王之殺而父乎則對曰唯不敢忘三年乃報越王夫差二年敗越于夫椒遂入越越子以甲楯五千棲於會稽使大夫種因吳太宰嚭以行成夫差將許之伍負諫不聽遂及越平初闔閭之入楚也使召陳懷公懷公不從夫差既克越乃侵陳以脩先君之怨七年復伐陳八年夫差及魯侯會于鄆徵

百牢魯人辭以禮弗聽魯人以吳無能爲也遂伐邾執邾子益邾茅夷鴻請救於吳九年爲邾伐魯爲城下之盟而還齊悼公娶於魯季氏季姬與季魴侯通魯人不敵歸悼公怒請師於吳將以伐魯魯歸季姬季姬嬖十年使人辭師于吳吳王怒城邾溝以通江淮且使倣師於魯將以伐齊十一年夫差會魯侯邾子邾子伐齊齊人弑悼公以說夫差哭之軍門之外三日徐承以舟師自海入齊齊師敗之乃還楚子期伐陳吳使季子救陳

不戰而還十二年齊人伐魯魯來請師夫差爲魯伐齊
戰于艾陵大敗齊師獲齊國書吳之將伐齊也越子率
其衆朝焉王及列士皆有饋伍員又諫弗聽使人屬其
子於齊鮑氏爲王孫氏王聞之使賜之屬鏹以死十三
年夫差會魯侯于橐臯又會衛侯于鄆衛人嘗殺吳行
人且姚於是吳人藩衛侯之舍魯使子貢爲衛君辭焉
乃舍衛侯十四年夫差會晉侯魯侯于黃池六月越子
伐吳大敗吳師獲太子友王孫彌庸壽於姚遂入吳吳

人告敗於王王惡其聞也自剄七人於幕下秋七月辛丑盟吳晉爭先晉趙鞅欲戰乃長晉侯既盟而歸及越人平十六年楚子西子期伐我及桐汭十八年越子來伐禦之笠澤我師大敗二十一年公子慶忌驟諫於王曰不改必亡弗聽遂適楚聞越將伐吳請歸平越遂歸欲除不忠者以說于越吳人殺之冬越圍我晉趙襄子使楚隆來弔二十三年越滅吳越王句踐使告王母死將居王於甬東辭曰孤老矣不能事君乃縊越人以歸

蘇子曰吳自太伯至壽夢十九世不通中國壽夢以下
始與諸侯盟會七世而亡然孔子作春秋終以蠻夷書
之謂之吳而不人蓋禮義不足故也春秋諸侯國而不
人者三楚始稱荆而已僖元年書楚人伐鄭文九年書
楚子使椒來聘自是遂與諸侯齒而吳越終春秋不人
此其禮義存亡之實也故予因春秋所書而推考三國
得失之効以爲吳越皆戰勝攻取能服人矣而無禮義
以自將吳欲以乘陵諸夏而不知止故闔閭之後覆亡

而不救越能自安於蠻夷無意於王伯故句踐之後固
陋而無聞至於楚禮義雖不足道而亦無愧於齊晉故
其後遂與戰國相終始由是觀之禮義之於爲國豈誣
也哉

古史卷八